

Sarajevo, 15.05.2018. godine  
Broj: I-104/18

**Vlada Federacije BiH**

**Gosp. Fadil Novalić, premijer Vlade FBiH**

**Gđa. Jelka Miličević, dopremijer Vlade FBiH**

**Gdin. Vesko Drljača, dopremijer Vlade FBiH**

**Predmet:** Zahtjev za formiranje koordinacionog tijela za parafiskalne namete u FBiH

Poštovani,

Svjedoci smo da je privatni sektor, osim velikog opterećenja rada koje je u FBiH najveće u Evropi, opterećen i visokim porezima i raznim parafiskalnim nametima.

Veliki broj parafiskalnih nameta ima negativan utjecaj, jer je to jedno nevidljivo opterećenje koje znatno utječe na smanjenu konkurentnost domaće privrede.

Smanjenjem i ukidanjem parafiskalnih nameta stvorili bi se povoljniji uvjeti za poslovanje bh. privrednika, a samim tim i za izgradnju povoljnijeg poslovnog ambijenta. Također, ubrzao bi se ekonomski rast i razvoj države, smanjila siva ekonomija, povećala zaposlenost i privukli strani investitori.

Naglasit ćemo da Bosna i Hercegovina ima tri puta više parafiskalnih nameta nego Srbija, a dva puta više nego Hrvatska.

Vlada FBiH je na tom planu načinila prvi značajan korak. U saradnji sa USAID-om sačinjen je registar parafiskalnih nameta. Od tada je prošlo više od godinu dana a posao na racionalizaciji parafiskalnih nameta je i dalje na početku.

Premijer Vlade FBiH, svojim dopisom od 13.02.2017. godine i Ministrica finansija, svojim dopisom od 11.04.2017. godine, pozvali su UPFBiH da se uključi u aktivnost na identifikaciji parafiskalnih nameta i „eliminisanje ili smanjenje visine nekih od njih“.

UPFBiH je odmah reagovalo i proslijedilo 9 takvih nameta uz prijedlog za njihovo ukidanje, sa detaljnim obrazloženjima. Budući da se oni nalaze u nadležnosti 6 ministarstava, naš prijedlog im je proslijeđen od strane kabineta Premijera Vlade FBiH, ali je bez rezultata, uz obrazloženja da se na tome radi, da će se razmotriti naš prijedlog, da se ne mogu ukinuti, da je to obaveza po Direktivama EU itd.

Uglavnom ni jedan nije ukinut osim 2 koja su se nalazila u nadležnosti Ministarstva za trgovinu. Ministar i njegovi saradnici su prihvatili da sa nama direktno rade na tom problemu, što je rezultiralo njihovim ukidanjem.

Također, djelimično smo analizirali navedeni registar i u 7 zakona, po osnovu kojih u registru postoji 18 parafiskalnih nameta, mi smo našli još dodatna 44. Niko nije reagovao niti dopunio spisak.

To pokazuje neophodnost za formiranje koordinacionog tijela koje bi radilo na ukidanju i smanjenju parafiskalnih nameta na nivou FBiH.

Shodno navedenom, predlažemo da se formira: **koordinaciono tijelo za ukidanje i smanjenje parafiskalnih nameta u FBiH.**

**Pravni osnov za osnivanje:** Član 14. Zakona o Vladi („Službene novine Federacije BiH“, broj: 1/94, 8/95, 58/02, 19/03, 2/06 i 8/06).

#### **Sastav koordinacionog tijela:**

1. Pomoćnik ministra u sektoru za poreznu politiku i javne prihode (Federalno ministarstvo finansija)
2. Jedan predstavnik iz kabineta premijera Vlade Federacije BiH
3. Predstavnici Udruženja poslodavaca FBiH.

#### **Nadležnost:**

- ✚ Koordinacija aktivnosti Vlade FBiH, Federalnog ministarstva finansija, Udruženja poslodavaca Federacije BiH sa svim drugim tijelima i institucijama (ministarstvima, Poreznom upravom, kantonalnim organima, organima lokalne samouprave, vanbudžetskim institucijama).
- ✚ Analiza opravdanosti prijedloga za racionalizaciju ili ukidanje pojedinih parafiskalnih nameta.

- ✚ Ažuriranje registra parafiskalnih nameta na nivou FBiH.
- ✚ Izrada zakona o parafiskalnim nametima i analiza njegove primjene.

#### **Način rada:**

- ✚ Koordinaciono tijelo sastajalo bi se dva puta mjesečno
- ✚ Na Dnevnom redu sastanka mogu biti najviše dva parafiskalna nameta
- ✚ Sastankom bi predsjedavao predstavnik Federalnog ministarstva finansija
- ✚ Koordinaciono tijelo bi razmatralo opravdanost ukidanja/smanjenja parafiskalnih nameta koji su na Dnevnom redu
- ✚ Aktivnosti koordinacionog tijela bi se vršile poštujući sljedeće principe:

1. Princip zakonitosti
2. Pravičnog utvrđivanja osnovice
3. Pravičnog utvrđivanja poreznog obaveznika
4. Postojanja protuusluge i ekvivalentnosti
5. Pojednostavljenja plaćanja i konsolidacije više naknada u jednu
6. Održivosti javnih prihoda: nadomještanje izgubljenog prihoda, namjensko trošenje sredstava i princip racionalnosti naplate.

Prije sastanka stručna služba Udruženja bi pripremila prijedloge za ukidanje/smanjenje parafiskalnih nameta, te uporednopravnu analizu propisa zemalja iz okruženja i zemalja evropske unije, te sačinila detaljno obrazloženje za ukidanje ili smanjenje parafiskalnih nameta.

Molimo Vas da razmotrite naš prijedlog te u cilju stvaranja boljeg poslovnog ambijenta i rasterećenja privrede, formirate koordinaciono tijelo za ukidanje i smanjenje parafiskalnih nameta.

Sigurni smo da je ovo mjera koja je potpuno u saglasnosti sa reformskim opredjeljenjem Vlade i stranaka koje je sačinjavaju, te da bi imala velike pozitivne posljedice na izgradnju adekvatnog poslovnog ambijenta. Pogotovo što ukidanje ili smanjenje velikog broja parafiskalnih nameta ne bi imalo negativne posljedice po budžete, nego na prihode određenih društvenih, ili profesionalnih grupa ili pojedinaca (notari, advokati, akademska zajednica, zapsolenici državnih tijela i institucija i sl.)

Srdačno,

DIREKTOR

Mladen Pandurević